

Inuiattut ullorsiornermi oqalugiaat 2023

Asasakka Kommune Qeqertalik-mi innuttaasut, Kommunalbestyrelsi sinnerlugu tamassi uummammik pisumik Inuiattut ullorsiornermi pilluaritsi.

Inuiaat kalaallit nalliuttorsiorfippat seqinersuup qullarnerpaaffia kaavinnarfia ullortuneq maanna nallerparput, ulloq inuiattut ataatsimoorluta nunatta pissarititaanik tamanik pilluataarfigisartagarput. Ulloq ataatsimoorfittut immitsinnut kulturikkut ileqqutsinnik naleqartitatsinnillu pikialaarfigisartagarput. Ataatsimoornerput anersaakkut nukittuungorfigisaratsigu ullup nalliunnissaa qilanaarersuataartarparput.

Inuiattut ullorsiornermi piareerpat nalliuttorsiornermi allamik aamma ornitaqarpugut tassalu illoqarfik Qeqertarsuaq tunngavilerneqarnerminiit ukiuni 250-nngortorsiorluni nalliuttorsiornermi julip 10-nnganniit aallartittumik, maannalu Qeqertarsuarmiut nalluttorsiornermi pikeruttulerput peqataaffiginissaallu qilanaareqaarput.

Aasaq manna nalliuttorsiornermi Qeqertarsuaq kisimiiingilaq aamma nunaqarfitta ilaat lkamiut tunngavilerneqarnerminiit ukiunik 175-inngortorsiornermi piareersarpoq, taakkulu aggustip aallartimalernerani nalliuttorsiornermi ingerlanneqartussa qamma peqataaffiginissaallu qilanaaraarput.

Kalaallit nunaanni ineriartorneq eqqarsaatigalugu allangoriartorfiit nalaaniippugut, nunarsuarmi oqataanerput aatsaat taamak ersaritsiginisumik misigaarput, nunarsuaq tamakkerlugu nappaalanersuup nalaani, maannalu Europami sorsunnerup nalaani nunarsuarmi pisunik sunnerneqarnerput misigisorujussuarput, inuiattullu ikittunguugatta aatsaat taamak ataatsimoorfeqarnermi pisariaqartitsigaarput.

Nunarsuarmi inuiaat pingartitaasa allangoriartorfiisa aamma nalaaniippugut, nunarsuarmi avatangiisit miguitsuutinnissaanik suliniutit aatsaat taamak ersaritsigalutillu sakkortutigaat, suni tamani piujuartitsineq qitiuvoq, allaat inuussutissanik niuveqateqarnermi piujuartitsineq qitiutinneqarlunarluni.

Migutsitsinerit assigiingitsut minnerpaaffimmiitinnissaat aamma suni tamani suliniutini qitiullunnersimapput. Maanna avatangiisinut inatsisit sukaterneqarsimanerannut malinnaaniarsuarput qularinngilarali suliasaq unammiaqisoq suleqatigiissutigutsigu ukiorpassuungitsut qaangiuppata pitsaasumik kinguaatsinnut iluaqutaasumik angusaqarumaarluta.

Kommune Qeqertalimmi eqqaagassalerinermut tunngasunik kommunit allat peqatigalugit suliffeqarfimmik piginneqatigiiffilorsimavugut, siunissami avatangiisit qorsuunerusut angunissaat pingaarnertut anguniagaralugu, tamannalu ukiuni aggersuni annertuumik aallutissavarput maannalumi iluatsittunik takussutissaqalereerpoq soorlu tunumi Qeqqatalu kommuniani nunaqarfiit ilaat qorsuullunnersimasut eqqarsaatigalugit. Nalunngilarput suliasarput ukiut siulliit ilungersunarluinnartussaasoq taamaamat ataatsimoorluta suleqatigiinnissarput pisariaqarlunarpooq, anguniagarlu ataatsimoorukkutsigu suleqatigiissutigalugulu angusaqalertorsinnaanerput qularinngilara.

Kommune Qeqertalimmi eqqaagassalerinermut tunngasunik immikkut sammisaqassuugut ukiassamut tassanilu innuttaasut qanimut suleqataallunnersissaat pisariaqartipparput, eqqakkagummi nammineq iliuseqarfigissallugit akisussaaffigaarput tassanilu suleqatigiinnisaq paaseqatigiinnissarlu pisariaqarlunarpooq.

Ukiuni kingullerni immikkut ineriartortinneqarsimasut ilagaat inuit pisinnaatitaaffiisa ersarinnerulernissaat, tamatumani meeqqat immikkut annertuumik suliniarfigineqarlutik aamma kommunitsinni.

Kommune Qeqertalimmi meeqqat immikkut suliniarfigineqarnissaat kommunalbestyrelsip pingaartitaasa ilagaat. Taamaamat meeqqueriviit pisariaqartitsiviusuni tamani piunissaat pingaartinneqarpoq ukioq mannalununaqarfitta annersaat Niaqornarsuk meeqquerivittaartinneqarpoq, meeqquerivik nutaassaq tullinguuttoq Qeqertarsuarmi sanaartornerqarnissaa maanna piareersarneqaruttulerpoq, maannalu meeqqueriviit meeqqallu atuarfii nutarterneqartussat anguniarneqaruttulerlutik. Meeqqat atuarfii aamma maani Aasianni nutarteriffigineqarnissaat pilersaarusiorfigineqarput siunissarlu ungasinnerusooq eqqarsaatigalu meeqqat atuarfiinik nutaannguinissaq anguniarneqarluni.

Meeqqat atuarfiini meeqqat angusaat qaffassarniarlugit suliniut Siunnerfik nangeqqinneqarpoq ilisimatuussutsikkut meeqqat atuarfiini paasisat tungavigalugit illoqarfinni meeqqat ajornartorsiutaat aallaavigalugit suliniatoqarluni. Atuarfiit ilaanni meeqqat akornanni qingasaaruttarneq ajornartorsiutaasooq millisinniarlugu suliniartoqarpoq, atuarfiit ilaanni meeqqat angajoqqaamik imigassamik ikiaroorartumillu ajornartorsiuteqarnerat suliniarfigineqarluni, atuarfiit ilaanni meeqqanik kinguassiuutigut kanguttaattuliortarneq akiorniarlugu aamma suliarartoqarluni.

Suliniarnerit tamakkua nukittuneruffiginiarlugit kommunalbestyrelse siorna aalajangiussaqarpoq meeqqanut inuusuttuaqqanullu siunnersuisarfik Misi, Qaammavik, ilaqutariilu illuini sulisugut ataatsimoortineqalissasut sulisut ataatsimoortut nukittuut sulianillu kivitsisinnaanerusut pigilernissaat siunertaralugu.

Meeqqat ersinngitsumik innarluutillit meeqqat atuarfianni sunngiffimmilu eqqummaariffigineqarnerat annertusisimavoq tamannalu pillugu suliniutit aamma inerisarneqaruttulerlutik. Ukioq manna aamma siunniunneqartunut nutaanut ilaavoq Kangaatsiap eqqaani nunaqarfinniit meeqqat Aasiannut atuariartortinneqartartut Kangaatsiami nutaamik atuarfittaarneq iluaqutigalugu nunaqarfimminniit qaninnerusumi atuariartorsinnaalernissaat sulissutigineqarpoq.

Meeqqat suliniarfigineqarnerani meeqqat oqariartuutaat aamma tusaaneqarnerulernikuupput, siornaak meeqqat isummersoqatigiiffiinik qinersisoqarmat meeqqat oqariartuutaat ersarilluinnartut kommunalbestyrelsenut apuunneqartalerput inassutaallu arlalitsigut timitaliiffigineqareerlutik meeqqanut iluaqutaasumik. Piffissarlu manna iluatsillugu meeqqat siunersuisoqatigiivinut ilaasortat qutsavigerusuppakka eqiingallutik oqariartuumminnik Nakuusap nuna tamakkerlugu ataatsimeersuartsitsarneri aqqutigalugit apuussisuartarmat kommunalbestyrelsinut Naalackersuisunullu, apuussasi sulinitsinni isumassarsiffittut atorluartaqaagut oqariartuutisilu tusaalluarlugit.

Innuttaasunik peqataasitsineq ukioq manna nukittorsarneqaaqqippoq utoqqaat siunersuisoqatigiivi pilersinneqarmata. Kommune Qeqertalik tamanut atuuttumik siunnersuisoqatigiit utoqqaat qinigaat ataatsimorlutik ataatsimeeqqammerput qanimullu suleqatiginissaat kommunalbestyrelsemiit qilanaareqaarput.

Inuutissarsionnermi inerisaaneq eqqarsaatigalugu ukioq manna immikkut suliniutit ersarissut tassaapput takornariaqarnermut inerisaanermut tungassutillit. Ilulissat mittarfissaata naammassiartulernera ilutigalugu takornariaqarnermi inuutissarsiut inuussutissarsiutinut nutaani pilersinneqartartut takussaanerulernikuupput.

Ippassaaninguaq nunatta pissarititaanik nerinerulernissatsinnut aqutissiulluartussatut aaqqissuussaq angisooq Food festival Qasigianguani ingerlanneqartoq peqataaffigaara, aaqqissuussaq angisoorujussuaq iluatsilluartoq pillugu aaqqissuussisimasut ikiuuttullu tamaasa pilluaqqujumavakka, aaqqissussarsi nerisaqarnitta eqqarsaatigeqqinnissaanut pingaarutilerujussuarmik aallartitsivoq, peqqinnarnerusunik nerinissarput kisiat pinnagu aammali nunatta pissarititaanik atuerulernissamut aqutissiueqataalluni. Inassutiginarporlu aappaagu illoqarfinni nunaqarfinnilu tamani ingerlanneqarnissaanut aqutissiueqataaqqullusi.

Ineriartortinneqarluartunut ilaavoq timersoneq aqutigalugu aalanerulernissarput, junip 9-luani inuusuttut timersuutini assigiingitsuni sungiusaasuunngornissamut soqutiginnittut ilinniartinneqaqqammerput allagartartaarutigisaminnik. Atarluni Timersornerup siuarsimareersut saniatigut aasaq manna malugilluarpagut meeqqat arsaattartut Qeqertarsuarmiit, Qasigianguaniilu angusarissaarneri minnerungitsumillu T-41-rut angusarissarlutik tikinneri puigunaatsuupput aalasa cup-mi Ilulissani unammersuarsimallutik tikimmata soorlu taamani meeraanitta nalaanni T-41 nunatsinni arsamik unammersuarnermi mesterinngorlutik tikikkaangata misigisartagarput. Timersoneq aqutigalugu inuummarinneruleriartorneq aamma malugilluarparput sulilu ineriartortinnissaa inassutiginaqaaq.

Tamassi inuittut ullorsiornitsinni pilluagaaritsi